

Ubrzanje ceste Sarajevo - Tuzla u fokusu razgovora Novalića i Tulumovića



Ubrzanje ceste Sarajevo – Tuzla bilo je u fokusu današnjeg susreta federalnog premijera Fadila Novalića i premijera Tuzlanskog kantona Denijala Tulumovića.

Premijer Novalić predvodio je delegaciju Stranke demokratske akcije na ovom susretu, a tokom dana bit će održano niz aktivnosti u Tuzli. Za večeras je najavljena svečana tribina, na kojoj će gost biti predsjednik SDA Bakir Izetbegović.

– Mi smo danas vidjeli, kao što to uvijek radimo na početku mandata kantonalnih vlada, šta su prioriteta rada, a gdje federalna vlada može biti od koristi – rekao je Novalić novinarima nakon sastanka.

Govorili su o ekonomskim i socijalnim programima te komunikacijama.

– Govorili smo o ubrzanju ceste Sarajevo-Tuzla, po principu Karaule. Da se snize dva prevoja, Nišići i Gojakovići – istakao je Novalić.

Premijer Vlade TK Tulumović naveo je da je susret bio konstruktivan kakav je i odnos federalnog premijera prema ovom kantonu.

– Obećao nam je da će dio stručnog tima poslati u Tuzlu, da stvari koje smo dogovarali konstruktivno zaokružimo – naveo je Tulumović.

U Tuzli će večeras biti održana svečana sjednica Gradskog odbora SDA Tuzla povodom 29. godišnjice od osnivanja SDA u Tuzli.

(fena)

Date: 05-08-2019